



GIUSEPPE CABIZZOSU

BIBLIOTECA

www.giuseppcabizzosu.it

Giovanni Giuseppe Delrio (Ottana 1930 -)

Poesie scelte in lingua sarda



GIUSEPPE CABIZZOSU

BIBLIOTECA

www.giusepecabizzosu.it

Giovanni Giuseppe Delrio

(Ottana 1930 -)

Poesie scelte
in lingua sarda



GIUSEPPE CABIZZOSU

BIBLIOTECA

www.giuseppcabizzosu.it

Giovanni Giuseppe Delrio

(Ottana 1930 -)

Poeta pastore ed operaio residente ad Ottana. Noto "Peppino"

A Bore

Bore debes ischire chi Peppinu
in dogni arte si faghet onore:
pastorighende, unu bonu pastore,
bonu massaiu in s'arte 'e contadinu.

In poesia est bonu cantadore
siat improvvisada o tavolinu,
cand'est in bidda est bonu cittadinu
amadu da su mannu e su minore.

Infines, dae tottus so amadu
so sempre calmu e mai m'inchieto
ca sa mama natura mi l'hat dadu.

Dae tottus su consizu l'acetto
e dae tottus benzo rispettadu,
so rispettadu c'a tottus rispetto!

A sa columba mia

Unu die in sa campagna fia
in su dovere chi so fitianu
sende distrattu che bido lontanu
una columba passare in sa via.

Nesi cussa est sa columba mia
a su trattu chi hat gentile e galanu,
tando m'avvio pianu pianu
si vicinu passare mi podia(t).

Ma issa bidu mi hat e cumpresu
forsis timinde de m'avicinare,
e ite faghet? che passat attesu!

Deo mi fisso frimmu a la mirare
isperende chi mi aeret resu
unu saludu in su vanu isettare.

Lontanu dae s'amore - pastoreddu

In d'unu monte 'e arbures copertu
continu a notte e die mi agatto
e vida solitaria bi fatto
che una fera in mesu 'e su desertu.

A descrier sas penas sas chi patto
non bi resesso e so cunvintu e certu;
bi diat cherrer unu Torquato
su ch'in rima fit mastro tantu espertu.

Certu unu Torquato mi cheria
a nde descrier su meu dolore
e lamentos de custa pena mia

ca no esistit prus mannu rancore
ne affannu e ne malinconia
che de viver lontanu dae s'amore.

Undighina a Nannedda

Prite goi columba
ti mustras cun timore
cun chie pro eternu ti hat amare
si finas a sa tumba
t'hapo giuradu amore
ell'ite dias cherrer de ti dare
ajo! e sas birgonzas
a un'ala las ponzas
ca t'amo finas a mi sepultare,
tando ti naro rosa
non poto tenner de te menzus cosa.